

Cabutan

Rakyat Kelantan tidak akan dapat
diabui mata mereka selama-lamanya,
kerana mereka akan tahu betapa
janji-janji kerajaan PAS itu tidak
pernah menjadi kenyataan. Masanya akan
tiba, apabila rakyat akan bertambah-tambah
sedar dengan keadaan mereka itu. – Tan
Sri Ibrahim Fikri.

*

Celik sahaja anak-anak (zaman
sekarang), apa mereka pandang atau dengar
ialah radio dan televisyen, dan
mereka tidak diberi ajaran mengenai
Sifat Dua Puluh yang patut lebih dahulu
mereka ketahui. – Tuan Haji Muhammad
Saman, dalam syarahan agamanya di Masjid
Bandar, Kariah Buntar.

*

Bila menjelang hari orang-orang
Negro dibebaskan dari tekanan, dan
menjelang hari tamatnya peperangan, maka
pada hari itulah baru roh
suami saya berpuas hati dan
berehat selama-lamanya – Puan Coretta,
balu mendiang Dr. Martin Luther
King.

*

Pakaian kebangsaan wanita-wanita Asia
sangat cantik, menarik hati dan
sesuai pula dengan suasana
di Asia ini. – Puan Ne Win.

*

Kita sentiasa membukakan hati
dan fikiran kepada seluruh dunia
menerusi logik yang sama yang
meyakinkan perjuangan yang lanjut,
bahawa kita sentiasa akan berbaik-baik
dengan orang yang membuat baik, dan
memusuhi siapa sahaja yang memusuhi
kita. – *President* Gamal
Abdel Nasser.

Tuan Haji Ya'acob Mohamed tentu
tahu – kerana beliau pun telah dua kali
menunaikan fardu haji – betapa
pentingnya Singapura mengadakan pegawai-pegawai
kebajikan (haji) di sana, sebagaimana yang
disediakan oleh kerajaan Malaysia
dan negara-negara seluruh dunia di dalam
musim haji di tanah suci. –
Tuan Haji Ahmad Tapa.

*

Kalau hotel-hotel itu tidak bersubahat
membiarkan pasangan-pasangan khalwat menggunakan
bilik-bilik hotel mereka, tentulah
perkara-perkara yang keji ini tidak akan
berlaku. – Tuan Sheikh Saad bin
Said, Qadi besar Kedah.

*

Hukuman denda dengan wang ke atas
pasangan yang berkhawat dan berzina
seperti yang berjalan sekarang, adalah
suatu hukuman yang ringan dan tidak
mendatangkan kesan kepada orang-orang yang
gemar melakukan perkara-perkara maksiat.
Hukuman yang ringan itu tidak
dapat mencegah perbuatan maksiat yang
sedang berleluasa sekarang. Zina dan
khalwat tidak akan berkurangan
sekiranya satu hukuman yang berat tidak
dikenakan, seperti hukuman sebat dan
rotan. – Cik Asmah binti Ahmad,
Ketua Pergerakan Kaum Ibu UMNO,
cawangan Padang Tembak.

*

PAS berazam menegakkan ekonomi
orang-orang Melayu melalui satu
rancangan yang tidak menyebelah ke mana-mana
pihak, sama ada Kapitalis atau
Sosialis, dalam menjalankan
rancangan ekonominya, jika PAS
terpilih memerintah nanti. – Dato'
Asri bin Haji Muda.

*

Intelek-intelek bukan boleh menjalankan
parti, tetapi boleh menjalankannya

rakyat semua. Dalam perhitungannya
politik kita tidak boleh mengira
seperti membuat ilmu hisab, tetapi
hendaklah dengan praktiknya sekali.
Kalau pemimpin-pemimpin politik membuat
perhitungan politik dari
universiti sahaja, maka politik
itu hanya merupakan politik
teori sahaja. – En. Senu Abdul Rahman.

*

Semangat keagamaan adalah perlu kepada
masyarakat Islam sekarang, terutama
di kalangan belia-belua, supaya mereka dapat
menunaikan tanggungjawab mereka
terhadap bangsa, agama dan tanah air
mereka. Kiranya mereka telah menunaikan
tanggungjawab mereka, maka baharulah
mereka layak dipanggil “pemuda
harapan bangsa” dan “pemudi tiang
negara.” Di samping bersama menegakkan
agama. – Dato' Haji Saad. – Menteri
Besar Perak.

*

Jika 500,000 bumiputera menanam
modal sebanyak \$50.00 tiap-tiap
seorang, maka akan terkumpul sebanyak
25 juta ringgit modal bumiputera
dalam perdagangan di negeri ini. Dengan
modal yang sebanyak ini terlembahlah
panji-panji menunjukkan empunya bumiputera
di tiap-tiap 30 atau 40 syarikat-syarikat
perdagangan dan perusahaan. –
Senator Ghafar Baba.

*

Pelajar-pelajar Kolej Islam tidak
pernah dihubungi oleh mana-mana parti
politik. Jika berlaku persamaan
pendapat antara pelajar-pelajar Kolej
Islam dengan mana-mana pihak, tidaklah
bererti hasutan telah berlaku. Pihak
yang berkenaan janganlah takut kepada bayang-bayang
kita sendiri dalam perkara seperti
ini. – En. Mokhtar bin Shafie –
Yang Dipertua Persatuan Pelajar-pelajar
Kolej Islam, sewaktu menafikan
tuduhan En. Mohd Khir Johari.